

Comoglotta

OFFICIAL REVUE MENSUEL DEL OCCIDENTAL-Union

CONSACRAT AL
DEVELOPATION,
PROPAGANDA E
APPLICATION DE

LINGUE INTERNATIONALE

OCCIDENTALE

Annu VIII

Septembre 1929

Nr 64 (9)

Redaction e Administration:
Mauer b. Wien (Austria)
Redactor: Ing. E. Pigal

Collaboratores redactional:

Dr. Aschwanden (Biel), Prof. R. Berger (Morges), E. Biddle (Chester), Dir. G. Bohin (Strasbourg), A. Deminger (Wien), L. M. de Guesnet (Paris), A. Haldin (Eskilstuna), J. Honti (Budapest), Ing. J. R. Hoerbiger (Mauer b. Wien), F. Houdek (Wien), K. Janotta (Kaltenleutgeben), J. A. Kajš (Brno), F. Lagnel (Chapelle), Reg.-Rat Dr. Mell (Rudolstadt), E. Moess (Wien), G. A. Moore (London), Dr. H. Nidecker (Basel), M. den Outer (Rotterdam), Prof. H. Pášma (Tábor), Dr. A. Peipers (Köln), J. Prorók (Leipzig), Mag. A. Z. Ramstedt (Helsingfors), Mag. R. Rehn (Helsingfors), Dr. K. Schüppel (Parchim), Dr. C. E. Sjöstedt (Uppsala), D. Szilágyi (Budapest), E. de Wahl (Tallinn-Reval), A. Wästerland (Berlin), Dr.-Ing. A. Wormser (Offenbach am Main).



Contene: Complet Grammatica de Occidental (Preface, Index, I. Phonologie: A. Alphabet, B. Pronunciation) de K. Janota, pg. 149. - Duplic consonantes, de E. de Wahl, pg. 155. - Chronica, pg. 160. - Humanistes, de Roda Roda, pg. 163. - Mastro in su profession, de L. M. de G., pg. 164. - Metric systema, pg. 164.

COSMOGLOTTA

Official revue international mensuel del Occidental-Union
(Organisation Universal de Lingue International Occidental)

Consacrat al developation, propaganda e application de Occidental.
Scientific e litterari. Redactet in Occidental.

Redaction e Administration: Postfach 10, Mauer bei Wien, Austria.

Abonnement: 7 ö. S = 1 doll. = 5,2 sv. fr. = 4,2 RM = 33 Kč.

Chec-Contos Postal: Austria: Nr. B-125.211 Sparkasse Mauer b. W.
Conto 3137; Germania: Köln 7831 Dr. A. Peipers; Francia: Paris
264-37 L. M. de Guesnet; Svissia: II. 1969 F. Lagnel, Chapelle (Vd).
Tchecoslovacia: 29.428 Praha, Milan Nedvídek, knihtiskárna, Tábor.

REGULAMENT DE COLLABORATION

1. Omni lettre deve contener (ultra su date) li complet adresse, scrit clar, del expeditor.

2. Li Redaction accepta e invia al Comité Explorativ de Lingue International Auxiliari (C. E. L. I. A.) omni articules pri lingual questiones; it absolutmen ne ingagea se in privat discussiones pri tal temas.

3. Li articules destinat a Cosmoglotta deve esser separat materialmen del privat lettres. Chascun question deve esser tractat sur separat folie e sub special titul, con exact referentie al antean articules tractant li sam tema.

4. Omni manuscrit deve esser scrit per machine, solmen sur un làtere del paper, con màrgine sat larg (adminim 20 mm) levul e lineas interspaciati. Ples preferer li formates del international lettre-papere con largore de 210 mm e altore de 297 mm (A4) o de 148 mm (A5).

5. Li Redaction ne es obligat acceptar articules in un altri lingue quam Occidental in li form approbat del Occidental-Academie.

6. Li Redaction ne es obligat inserter manuscrites e responder a lettres queles ne satisfà li supra-citat conditiones.

7. Actual communicationes, por Chronica etc, deve arrivar ante li 5esim de chascun mensu por esser insertet in li numerò sequent. Li Redaction ne posse obligar se publicar un articulo in un cert termine.

8. Li Redaction retromisse un manuscrit non-printat solmen si li autor adjunte sufficient moné por francatur.

COSMOGLOTTA

Annu VIII

Septembre 1929

Nr 64 (9)

COMPLET GRAMMATICA DE OCCIDENTAL

In li present caderne noi comensa publicar un complet grammatica del lingue Occidental, demandat ja de omni láteres. Pro que noi ne posse editar ti ovre quam brochura separat pro li grand custas de un tal printage, noi inserte it in nor revúe in pluri continuationes. Senior K. Janotta ha prendet sur se li pena composir ti ovre. Red.

P r e f a c e.

Naturalmen ti unesim elaborate de un «Complet Grammatica» va contener mult lacunes in comparison al desires de multes de nor coidealistes.

Ma certmen un duesim gruppe del adherentes de Occidental, propagandistes, va opiner, que ti ci ovre es tro ampli, tro detal'at e que it involue li dangere que li profan publica va blamar li «desfacilitás», li grand númere de regules e li «exceptiones» del grammatica de Occidental. A ti gruppe de Occidentalistes yo responde que yo ha monstrat per li curt grammatica apparit in li numerós 56 e 58 de Cosmoglotta, que li grammatica fundamental de Occidental ne es plu long quam li famosi 16 regules de Esperanto; ya, in un laconic grammatica noi va monstrar que li tot grammatica de Occidental, necessari por un hom de bon european erudition, posse esser printat sur un postcart. Si on va criticar li voluminositá del present ovre, on va blamar li existentie de international paroles in li lingues natural, de queles li grammatica es mem mult plu voluminosi, quam ti de Occidental.

Un altri objection es ti que mani autores de Occidental-manuales national ne vell posser trovar un just selection ex li materiale disponibil in li «Complet Grammatica». Un tal timore ne es justificat; nam li base sufficient por li fundamental manuals national ja existe in li «Okzidental-Kursus in 10 Lektionen» de A. Z. Ramstedt e in li «Repetitorie de Occidental» redactet in Occidental; li du es insertet in li german libre de introduction «Occidental, die Weltsprache», quel va apparir circa intra tri mensus.

Senior Wahl ja ha plur vezes monstrat, e in maniere excellent precipue in li articul «Exceptiones e li vive» in nr 43 de Cosmoglotta, que li talnominat exceptiones es un facilitation del lingues por lor usada, por li parlacion e comprension de li pensas. «Un lingue ne existe por parlar secun grammatica o logical regules, ma inversmen, tis existe por facilitar li parlada... Un superflui regularitá fa sentir-se quam insupportabil in li practic vive... Ne li apprension de un

lingue es lu essential, ma su usation!!» Talmen Wahl ha egardat in Occidental li leyes del vive, queles es plu flexibil quam tis del mathematica e mecanica. Lass nos egardar que li tēmpore de appension de un lingue, e precipue de Occidental, es mult plu curt quam li durada de su usation.

In plu, Esperanto have anc su grand manuales, mem plu ampli quam li present. On mey comparar: «Esperanto, La gramatiko de Dro Zamenhof kun komentaro» de prof. P. Christaller, Stuttgart 1921, 73 pagines; «Esperanto, Sprachlehre» de prof. Dr. Joh. Dietterle, Leipzig 1926, 44 pagines; o mem special ovres: «La Elementoj kaj la Vortfarado» de E. Ĉefeč, Paris 1911, 64 pagines; «La Esperanta Vortfarado» de Paul Fruictier, Paris 1913, 115 pagines; «Prepozicioj kaj Akuzativo en Esperanto» de A. Mair, Wien 1926, 70 pagines, etc. etc. E anc Ido have su «Kompleta Gramatiko Detaloza» de L. de Beaufront, Esch-Alzette, 1925, 224 pagines.

On apprende Occidental ne solmen por posser leer li lingue; por ti scop li studie de un curt clave suffice. E quam es demonstrat, mult milliones de persones comprende Occidental sin studie anteriori. Ma li adherentes vole ne solmen comprender, ma anc posser usar ti lingue correctmen tam in parlacion quam in scrition; e pro to illi besona ne solmen li curt regules pri li paroles gramatical, ma anc regules pri li parol-formation e syntax.

Per su grand contenete just anc in li du ultim punctus, li «Complet Grammatica» va far dispensabil li detal'at studie del lexicos ante usation del lingue. In ti sense li letores mey comprender mi ovre.

Por me e por li altri iniciantes del present ovre esset ductent in prim li desir dar al Comité Explorativ e al Academie un base plu larg por lor explorationes e decisiones, e in sequent li esper que per un tal ovre mult hesitationes, erras, miscomprendes e mislabores de nor collinguanes va esser evitat.

Ja nu, quande solmen un micri part del Complet Grammatica es finit, yo posse dir que it es ne solmen mi ovre, ma anc li resultat del collaboration del seniores Pigal e Deminger, e in unesim rang de senior de Wahl, de quel yo admira plu e plu mult li ampleore de su interlinguistic saventies quant plu progresse li elaboration de ti ci ovre. Li collaboration de ti ci seniores esset pri quelc articules tam grand que yo esset quasi solmen li organisator del collaboration.

K. Janotta.

I N D E X

I. Phonologie

- | | |
|------------------------|-----------------------|
| A. Alphabet | E. Quantitá vocalic |
| B. Pronunciation | F. Textu exercitiv |
| C. Accentuation | G. Nómnes de litteres |
| D. Separation syllabic | |

II. Flexion

- | | |
|--|--------------------------|
| A. General remarcas pri li parol-formation | C. Desinenties primari |
| B. Desinenties | D. Desinenties secundari |

III. Derivation

- | | |
|----------------------|-------------|
| A. Themis derivatori | B. Suffixes |
|----------------------|-------------|

IV. Composition

- | | |
|-----------------------------------|--------------------------------|
| A. General remarques | E. Thematis presentis quam de- |
| B. Assimilation in li composition | terminativ |
| C. Thematis inseparabil | F. Grec prefixes |
| D. Prefixes | G. Familias de paroles |

V. Orthographie

- | | |
|---|--------------------------|
| A. Mollat sones | F. Majusculæ |
| B. Duplex consonantes | G. Abbreviationes |
| C. Transcription del latin paroles | H. Signes non-alphabetic |
| D. Transcription del grec paroles | I. Interpunction |
| E. Transcription del non-classic
paroles | |

VI. Partes del discurs

- | | |
|----------------|-----------------|
| A. Articuli | F. Verbum |
| B. Substantive | G. Adverbia |
| C. Adjective | H. Preposition |
| D. Pronomine | I. Conjunction |
| E. Numerales | J. Interjection |

VII. Syntax

VIII. Metrica

IX. Correspondentie

I-esim Capitulum: PHONOLOGIE

A. Alphabet

Li alphabet de Occidental consiste ex 26 simplic litteris, ad plu ex 2 litteris apostrophatis e ex 8 bilitteris (digrammas):

a, b, c, d, e, f, g, h, i, j, k, l, m, n, o, p, q, r, s, t, u, v, w, x, y, z;
i', n'; ch, eu, gh, ph, rh, sh, th, zz.

Li nomines del litteris trova se in li parte G del present capitulum.

Li alphabet del 26 simplic litteris corresponde con li alphabetes angles e german. Quam medie de enumeration in libris etc on usa solmen ti 26 simplic litteris.

B. Pronunciation

1. Vocales

Occidental have 7 vocales: **a, e, i, o, u, y, eu**. Li unesim 5 es pronunciat quam in german, italian, hispan e slavice linguis.

Angleses mey attender li pronunciation continental del vocales. it es: **a** quam in A father o calm; **e** quam in A vein; **i** quam in A unique; **o** quam in D so, plu pur quam in A not, so (sin u succedent); **u** quam in A rule.

Franceses mey attenter que in Occidental ne existe vocales nasal: **an, en, in, on, un** = F ane, ene, ine, one, oune; salon = F salone [transcription: sa-lón]; indic = F ine-dique [ín-dík]; aqua = F a-quoi [á-kwa]; quande = F couanne-de [kwán-de]. Ad plu Occidental **u** = F ou [u].

Germanes mey attenter que du vocales intersecuent in general es pronunciat separat: aer = D a-ehr [aér], país = D pa-ihs [país], leer = le-ehr [le-ér], leibil = D le-ih-bil [leíbil], ciel = D zi-ehl [tsyél].

y vocalic es pronunciat quam german **ü** o frances **u**; transcription [ü], por exemple: cylindre [tsülíndre], hymne [hü'mne] styr [stür], physica [fü'sika], analyse [analü'se], cyan [tsüán], yttrium [ü'ttryum]. Pos un vocal e in comensa de un parol anc ante un vocal, **y** es consonant; su pronunciation es explicat in li secuent articul.

eu es egal al frances **eu** e al german **ö**; transcription [ö], por exemple: Europa [örópa], meuble [mö'ble], neutral [nötrál].

i e **u** ante vocales in plursyllabic paroles, u pos q anc in monosyllabic paroles es pronunciat tre curt, presc consonantic e ne posse formar propri syllabes; transcription [y] e [w], p. ex.: ciel [tsyél], lingue [língwe], aqua [ákwa], piano [pyá-no]; quam [kwam], que [kwe], quel [kwel], qui [kwi].

ai e **au** es diphtongs e es pronunciat [ay], respectivmen [aw]: email [emáy], rauc [rawk], applause [appláwse]; caul [kaw].

2. Consonantes

Occidental have 20 simplic consonantes (sin **y**), 2 consonantes mollat (litteres apostrophat) e 8 consonantes indicat per digrammas.

In general li consonantes es pronunciat quam in italian con cert modificationes.

In lu secuent es indicat ti consonantes, de queles li pronunciation diverge del italian o have desfacilitás por angleses, franceses o germanes.

c e **g** ante **e, i, y** es pronunciat dental, respectivmen sonor-sibilant, it es **c** = [ts]; **g** = g in D Page, Loge, Gelee, j in frances; transcription [ž]. In omni altri casus **c** e **g** es pronunciat guttural; transcription [k], respectivmen [g]. Con **h** li litteres **c** e **g** forma li digrammas **ch** e **gh**, de queles li pronunciation es indicat in infra.

h es sempre pronunciat quam in german. Li digrammas **ch, sh** etc es tractat in infra.

j es egal a **j** in A jazz, a **dg** in D Budget e **F** budget, transcription [dž]: januar [džanwár], conjugation [kondžugatsyón].

q es pronunciat quam **k**: banqero [bankéro], acquisition [akkwisitsyón].

s have du pronunciations; (a) it es sonor («leni», A voiced, D stimmhaft, weich; transcription [s]) inter du vocales, p. ex.: cose [kóse], rose [róse], position [positsyón], conclusion [konklusyón], usa [úsa], in plu in fine de parol, inmediatmen pos accentuat vocal, si on posse etymologicmen supposir que un vocale secue li **s**: frances(i), ples(er), país(e), pis(e), precis(i), omnicos(e), ros(e), poros(i), repos(e), abstrus(i), confus(i), mus(o), obtus(i), refus(a). Ma (b) in omni altri casus **s** es pronunciat surd (i. e. «fort», A voiceless, D stimmhaft, scharf; transcription [ss]), p. ex.: sol [ssol], grotesc [grotéssk], person [persón], épos [époss], ómnibus [ómnibuss], schisma [ss-khíssma], egoism [egoíssm]; anc li pluralic **s**: patres [pátress], veritás [veritáss], unités [unitéss], vertús [vertúss], omni **ss**: masse [masse] etc; e li paroles finient per vocal + **s**, queles ne permisse supposir un secuent vocale, p. ex.: es [ess], li present de esser; li pronomines les [less], nos [noss], vos [voss]; li preposition pos [poss] quam abbreviation de **L** post; li prefixes des-, dis-, mis-, p. ex. desinfecter [dessinfektér], disaffection [dissaffektsyón], misalliantie [missallyántsyé]; etc. Germanes mey attenter que anc li combinationes sch, sp e st es sempre pronunciat con **ss**, do [ss-kh], [ss-p], [ss-t] (e ne quam in german [sh], [sh-p], [sh-t]); do schema = [ss-khéma], spirale = [ss-pirále], statue = [ss-tátwe]; anc li **s** initial es sempre surd secun li regul (b): sala [ssála], self [sself], signal [ssignál], soda [ssóda], sud [ssud], symbol [ssümból].

t deveni un sibilant in li finales -tia, -tie, -tion; transcription [ts]: scientie [sstsyéntsye]; nation [natsyón]. In ceteri li pronunciation de **t** es li sam quam in omni altri lingues europian.

v es sempre pronunciat quam in villa, nequande quam **f**, quo mey egardar precipue li germanes.

w es pronunciat quam in angles, it es un u presc consonantic quam in A water, transcription [w]: watt [watt], west [west].

x = [kss], p. ex. extra [éksstra]; inter vocales **x** posse esser pronunciat anc [gs]: exemple [egsémpel].

y pos un vocal e in comensa de un parol anc ante un vocal es pronunciat i consonantic quam in A yes e quam **j** in german

e italian, transcription [y], p. ex.: yes [yess], rayon [rayón], antey [antéy]. Pri li vocalic y vide li articul precedent.

z = [ds]: zefir = [dsefír], bazar = [badsár].

l' es pronunciat circa quam li in «familie» [famílye], transcription [ly], p. ex. guil'otine [gwilyotíne], bil' [bily], bil'et [bilyét], tal'e [tálye], bul'on [bulyón], toal'e [toálye], orel'e [orélye], trel'e [trélye].

n' = circa [ny], inter consonantes presc ne audibil; p. ex. distin'er [disstinyér], distin'tion [disstin(y)tsión], champin'on [tchampinyón], attin'er [attinyér], attin'tion [attin(y)tsyón], castan'e [castánye], sparn'ar [ssparnyár], vicun'a [vikúnya].

ch quam in angles e hispan, quam tsch in german; transcription [tsh], p. ex. chambre [tchámbre], chines [tshinés], brochura [brotshúra]; ma anc quam ch in frances e sch in german; transcription [sh], p. ex. machine [mashíne]. Ante consonantes o juntet con y, o in li syllabe arch e pos s, ch es pronunciat quam ch n D machen o quam j n S Méjico (Mexico); transcription [kh], p. ex. yacht [yakht], chromometre [khronometre], psycholog [psükhológ], architect [arkhitékt], monarchist [monarkhíst], schisma [skhíssma]. Ti qui ne posse pronunciar [kh], deve usar li pronunciation [k].

gh = g guttural, ante e, i, y; p. ex.: ghesha [géshe], ghepard [gepárd], ghetto [gétto], ghibellino [gibelíno].

ph = f in paroles de grec orígine, p. ex. fotograf = photograph [fotográf]; fosforescer = phosphorescer [fossforesstsér].

rh = r in paroles de grec orígine, p. ex. reumatic = rheumatic [römátik].

sh es pronunciat quam ch in frances e sch in german; transcription [sh], p. ex. shrapnell [shrapnéll].

th = t in paroles de grec orígine: teosof = theosoph [teo-ssóf]; litograf = lithograph [litográf]; rytme = rhythm [rützm].

zz = [ttss], p. ex. pezze [péttsse], piazza [pláttssa].

Arte es li potentie crear vivent organismes ex tones, ex paroles, ex colores, ex formes, ex species, ex córpores. Li creations del arte es dependent del milieu de pensas e de senti-mentes, del cultura de su témpore. Ili per to forma-se a un unitá, a un styl. E li styl es modificat per li character del nation.

R. Stiefler.

Opiniones es plu fort quam armées.

Lord Palmerston.

DUPLIC CONSONANTES

de E. de Wahl

In omni europæan linguis on posse distin'ere curt e long vocales. Mem in russ e frances, u ti differentie es minu grand quam in li altri linguis, on distin'e bon inter R želanie a želannyi, o F pâte e patte. Por transscription de ti differentie it existe divers methodes. Li max principal, si on abstrae del caotic methodes angles e german, es sive monstrar li curt vocales per pluri consonantes sive li long per pluri vocales. Inter ili li max simplic es li reduplication del litteres, ad saver in hollandes, finn e estonian per duplication del vocales, in omni altri linguis per reduplication del consonantes. Yo ne mentiona ci li methodes del hungarian, tchec etc, monstrar li longore per divers accentus. Proque li linguis hollandes, finn e estonian have tre poc extension in li international communication, noi deve secuer in li ortografie de Occidental li methodes usat in angles, german, frances, italian, portugales, scandinavic, russ, li aplastant majorité del europæan grand civilisat nationes.

Advere li lingue hispan monstra nos que on posse totalmen abolir presc omni duplic consonantes. Ma on save que to tam fort deforma mult conosses international paroles, que durant li periode, quande li lingue international es ancor foren a omnes, it va esser plu practic retener max mult scritiv images in un form quel ne evoca hesitation o miscomprende.

In fact anc in Occidental paroles quam casu, casse: can, canne; pane, panne; car, carre; cura, curre, etc ne fa desfacilitás e ne posse esser changeat. Li principal hesitation es incontrat che li hereditat latin composit verbes e lor derivates: abbassar o abassar, accurat o acur-
rat, inreal o irreal, collaborar o colaborar etc. Ti duplic consonantes have lor origine in li assimilation de divers consonantes ja in latin. It adveni si li prepositiones a(d), con, in dis, ex, sub, tra(ns) es ligat con un altri parol.

Max bon on va vider to ex li secuent tabelle¹⁾

¹) Abreviaciones: D german, A angles, F frances, I italian, R russ, S hispan, P portugues, L latin, Occ Occidental, LI langue internationale.

Form		ante	Exemples e notes
original	juntiv		
ad	a- assimilation	c, j, g, l, n, p, r, s, t	<p>in F sovente sin assimilation: abattre, quel deriva de ab- ne de ad, sammen ab-breviar F abreger a-munition, (l ammunizione;) F averer, avocat (l abbellire, abbattere,) do ci du divers prepositions.</p> <p>accent, accession, acclamar, accomodar, accreditar, accusativ, acquisiter, acquittar, affect, affinitá, affliction, affluer, affollar, agglutinar, aggravar; allargar, alliteration, allongar; annular.</p>

F o r m		ante	Exemples e notes
original	juntiv		
	ad	h, j, m, v e vo- cales	annunciar, annexer; apparition, applicar, applau- der, apreciar; arrangear, arrestar, arrivar; as- semblar, assentir, assimilar; attaca, attentat, atti- rar ad-herer; ad-junction; ad-monition; advocar; ad-aptar, ad-equat (ma in l ammonizione, avvo- cato)
con	co-	voca- les e h	co-education, co-activ, co-idealist, co-incident, co- administrator; cohesion, cohabitation
	assi- mila- tion	l, m, (n), r	collocar, collaborar; communist, commission; con- nex, conniventie; corroborar, correspondentie, corruption
	com	b, p, (m)	combatter, combuster; composition, compressor, combination
	con	in omni altri casus	concav, conceder, concession, condensar, con- fection, confluere, confederation, congenial, con- gregation, conjecter, conjunter, conquestar, consac- rar, contemporan, continuar, convergent, convenir, conversion, convulsiv
dis	di-	m, r, v, (g), (l)	dimension, digestiv, digression, dilacerar, dilater, diluvie, diminuer, directer, divagar, divergent,
	dif- assimi- lation	f	differentie, difform, diffider, diffusion
	dis-	in li altri casus	discontinui, discordant, discurs, disharmonie, dis- juntiv, dislocation, disposir, disseminar, dissident, dissolution, distribuer
ex	e-	b, d, g, j, (c), l, m, n, r, v	(F étrancher: écremer, écorner, egoutter); eden- tat, ejacular, elargar, elaborat, emancipar, emer- sion, enunciar, enorm, eradicar, evocar, evident
	assimi- lation	f	effeminar, effortie (P esforçar, esfolhar)
	ex	c, p, t, s, (f), h, vocales	exaudir, excess, excavar, excrement, exposir, ex- temporar, exsiccar, exempt, (F exfoliatif); exhu- mar, exuberar, exquisit
in	(i-)		(in italian paroles l istituto)
	(ig-)	(n)	ignorant, F ignominie, F ignoble, (S innoble, F in- navigable), innocent
	im-	b, p, (m)	F imbiber: implicar, impotent, (F immortel); im- pression, imputar
	assimi- lation	m, l, r	immatricular, illegal, irrational

F o r m		ante	Exemples e notes
origi- nal	juntiv		
	in-	in altri casus	inarticulat, incaut, incredibil, indurar, inevitabil, influentie, ingredientie, inhuman, injection, innavigabil, innocent, inocular, inquiet, inscription, intolerant, invariabil
(ob)	(o) assimi- tation ob-	(m) f, p in altri casus	Ha perdit su creativ fortie, existe solmen in traditional paroles, F omission offensiv, offert, officie, opposition objectiv, obligatori, obseder, obstruction, obtener
sub	su- sus- assimi- tation sub	s p, (c) c, f, g, p in li altri casus	(F sujet, soulever, souligner, soumettre; sourire); suspect, suspirar. suspende, susceptibil (tre rar) succeder, succursale, suffix, suffusion, suggestion, supposir subaltern, subdivision, subhastation, subir, subjunctiv, sublunari, submarin, (F sous-marin), subordinar, subsidie, substrat, subterran, (F souterrain), suburb, subvention
trans	tra- tran- trans-	d, j, (m) s	tradition, traduction, traject, (l tramontana) transcription, transcendent, transilvan transalpin, transbordar, transcontinental, transformar, transgresser, transit, translater, transmigration, transparent, transsubstantiation, transversal

Ma anc ci li modern lingues sovente secue altri e divergent metodes. Durantque p. ex. li lingue hispan supresse presc omni duplic consonantes, li lingue italian excelle in ili e usa les anc ta u li altri lingues ne have les. Li lingues angles, german e frances ordinarimen conserva li latin form, ma anc ci on posse vider provas de autonom formation, quam p. ex. in li F sou (s)-, a-, ex-, specialmen in li nov derivationes e in li vivent omnidiari paroles. Do it ne vell esser nullmen innatural o despermisset, si anc in ti dominia on vell provar regular li usation secun unitari vidpunctus.

Ci nu aperte-se du vias.

1) On secue li latin metode conosset in li scientie e anc tre sovente usat in A D F. To vell esser unitari, e conform al metode de Latino sine flexione. It es, on diffini, in quel casus on usa li plen form, in quel li assimilat e in quel li acurtat (elisionat) form, p. ex. con-, col-, co-.

Ma quam on posse vider in li supra exposit tabelle li regules del assimilation ne es unitari; ili varia che chascun son, e in chascun preposition. Samli li abreviat formes. Per altri paroles, to representa un tal defacil e caotic metode, que almen yo til nu ne ha posset trovar un unitari general regul, quando usar li plen form, quando

assimilativ formes e quande li acurtat. In omni casu on va conceder que li metode de ti composition va far desfacilitás al slaves, ugro-fines, orientales e mem al minu instructetes ne solmen del germanes ma anc del angleses e romanic nationes, p. ex. li hispanes.

Li duesim metode vell esser trovar un practic compromiss, quel vell esser si ne absolut scientific, ni rigoros, tande almen un poc plu facil por non-latinistes.

Por orientales, slaves, etc it vell esser naturalmen lu max simplic, si on vell posser sempre usar li plen form del preposition; p. ex. con-batter, con-position, con-idealist, dis-gression, disvagar, disfusion, exlaborar, exdentat, extradicar, immortal, ilegal, innobil, inmatricular, inreal, subposir, subpender etc.

In fact in li lingue hispan existe ja comensas in ti direction: conllevar, commemorar, commensal apu comensal, commiliton, commiseration, commutation, conregnante, ilegible, immaterial, immersion, immortal, inmunidad, innoble, disforme, disminucion.

Advere on posse dir que mult paroles vell sonar tre haccat e cacofonic, p. ex. exlaborar, extradicar etc. Ultra to on posse adducter que in multissim paroles li sentimente de composition ja de long ha perdit se, e ne es sentit plu.

Pro to forsan li max simplic e facil expedient in ti desfacil question sembla esser li sequent metode:

In omni casus u on senti (o vole sublinear) li idé del composition on usa li clar plen form. Apu ti plen form on posse usar anc li acurtat co- (con), di- (dis), e- (ex), i- (in), [o- (ob)], su- (sub), tra- (trans), si per tal maniere on receive paroles plu simil al comun usation, p. ex. co-idealist, co-laborar, comision, conex, correspondent, corruption, differentie, difusion, digression, divergent, edentat, emerger, eradicar, efeminar, ilegal, irrational, ofender, suspirar, suposition, traduction etc.

Tande li analogie vell postular supresser li duplic consonantes anc in li altri casus u on ja ne senti li composition. To vell in fort gradu simplificar li usation e anullar li hodial hesitation che li mult persones queles plu ne memora li latin etymologie.

Scientistes e erudites forsan va revoltar pri mutilation de sacrosant international paroles, ma ili oblivia que ti internationalitá es principalmen A D F e scritiv, in li pronunciation ili ne lude un role. Adplu li L. I. ne es solmen por li erudites de grand european popules, ma anc por li altri homes, do omni facilisationes e regularisationes possibil deve esser fat, si noi ne ariva per to a innatural e hideos formes, e li recivet formes presc omnis es identic al hispan.

Ma on deve memorar que to quo ne existe in A F ancor ne es innatural, e que Occidental ne es un mixture de A F, ma un autonom lingue inter-national.

Advere on posse replicar, que li duplic consonantes posse haver anc un rol indicatori: Si on ne conosse li parol de su propri lingue, li duplic consonantes strax averte li leent, que ci il have un composition con un del prepositiones. Ma tande on vell dever scrir li duplic consonantes in omni casus de combination con prepositiones quam in italian, e ne quam in L A D F, p. ex. abbassar, abbatter, abbreviar, abordar, accomodar, accompagner, accustomar, ammassar, ammirar, ammonition etc.

Por li letura tal metodes forsan vell esser cert facilisation, ma por

rect scriptura yo dubita que to vell esser tre commed e yo time evocar un cáos, proque on nequande vell saver ca li parol usat es un composition (anc plu ne comprensibil) o un parol primari, p. ex. commun, immun, addition, allotria, allotrop, alarm, etc.

Naturalmen mult persones, acustomat usar li duplic consonantes va usar les inconscientmen, e in fact to ya ne fa necos mal. It sembla do max simplic abolir in li compositiones con prepositiones li duplic consonantes e far li composition sive per li plen formes o per li abbreviat tales, e in sam témpor tolerar anc li usation del duplic consonantes.

Per to noi receive un sufficient regulari metode, quel es strax recognossibil, ne tro lontan del usu del grand nationes, e un procedentie ja usat in li vastmen expandet lingue hispan.

It es possibil que forsan alqui vell posser trovar un plu bon expedient. Tande il mey far su propositiones al C. E. L. I. A. (Comité Explorativ de Lingue International Auxiliari). Ci yo peti ne dissipar li discussiones pri linguistic questiones in un propagandajurnal, quo posse desconcentrar li yun adherentes e li profan publica, evocante li fals idé, que it ne vale comensar, studiar o propagar Occidental, proque it ya ne es stabil e ancor ne pret, durantque on ancor discute pri changes. In veritá li majorité de proposit changes ha esset repulset per C. E. L. I. A., proque ili sive ne esset ancor ne sat investigat, ni mem bon meditat, sive ne aportat al lingue un serios avantage, sive esset solmen efluentie de personal gust. Li circulares de C. E. L. I. A. nu ja es abbonabil por omni interessates, e it es desirabil concentrar li divers opiniones in un loc, ad saver in li circulares de C. E. L. I. A. Ultra to ante proposit changes e evocar un sovente totalmen inutil polemica, it vell esser bon, presentar questiones pri dubitativ punctus. Sovente li discussion es finit, si on receive li response, proque in max mult casus it acte se pri miscomprehension o ne sufficient profund conossentie del lineas directiv de Occidental. Naturalmen mult retuchas posse e va esser fat, ma mult coses, queles sembla al nov interessates quam mancas o erras, es profundmen meditat necessitás, e ne posse esser changeat sin destructer li tot unitari construction. To on mey egardar, specialmen in ti unesim témpores u li stabilitá e li soliditá de nor lingue es max necessari. On ne mey succusser li fundamentes del structura. Li extern politura li vive self va far con témpore.

Remarca.

Li precedent articul explica li desfacilitás del decision pri li duplic consonantes. Pro que li problema ancor ne es soluet, li Occidental-Union, conform al consilies de sr de Wahl, dá libertá in ti punctu de orthographie. Ma por satisfar li desires del Occidentalistes queles demanda un unitari scription recommendat officialmen, li Redaction preliminarimen e secun possibilitá va usar li assimilat formes con du consonantes in casus u ili trova-se anc in li lingues latin, angles, frances e german. Per li scription historic (i. e. samli per scrir chronica, psychic, thema, physica, aphel, orthographie, rhythm, chlorophyll etc) noi justifica anc li pretension pri li pedagogic valore linguistic de Occidental. In ultra li altri metode, pro esser ancor ne soluet, have li desavantage que on sovente ne save li limite u scrir un, respectivmen du consonantes. Red.

CHRONICA

INTER NOS, official bulletin dumensual del B. O. S. (BRITISH OCCIDENTAL SOCIETY), august, (abonnement annual por non-membres de B. O. S.: 1 shilling angles per li secretario Eric Bidle, 18 Meadows Lane, Chester, Anglia). Propagativ lettres, partialmen in Occidental, ha apparit in du conosset semanal gazettes. (Time and Tide, 24 mai; T. P.'s Weekly, 8 junio). Un angles libre de apprension intitulat «Outline of Occidental», contenent circa 40 págines, apparit in liverationes. Li plen serie es ricevibil contra un franc sviss o egal valore.

E. B.

HELVETIA, organ del S. A. P. O. (Sviss Association por Occidental, Adm. Fred Langel, Chapelle, Vd.) Ex li contenete: nr 11: Un problema soluet in 1907 (Prof. Leau e Occidental) de Prof. Ric. Berger, Barbusse e Esperanto, Li bon paroles obliat, Vocabularium illustrat de Occidental, Li argumentes de sr de Beaufront contra Occidental, Un combatte contra vent-molines, Nor servicie e informationes, Li monde rident, Li trist situation de un sved mundlinguist (P. Ahlberg), Mundcolor-lingue (designation universal identic del colores) de Major H. Tanner; nr 12: Linguistica amusant de Dr. Aschwanden, nr 13: Li militant occidentalistes, Li maledit naturalitá, Li lingue tro expandet, Tolero, Un monde in li alfabet, nr 14: Psychologie del mundolingvist de R. B.

INDEX OCCIDENTAL-FRANÇAIS de Ric. Berger, 38 págines hectographat, contenent li frequent paroles. Precie sv. fr. 0.50.

SUPPLEMENT OCCIDENTAL-FRANCES al RADICARIUM DIRECTIV de OCCIDENTAL de Ad. Creux, 58 págines hectographat, contenent paroles ne trovabil in li Radicarium de E. de Wahl. Precie sv. fr. 1.—.

Li autores de ti ci du vocabulariums (recevibil che S. A. P. O., Chapelle, Vd., Svissia) comunica que li present apparitiones es solmen prov-printes con erras e mancas queles va esser evitat in un duesim edition. Malgré to li du ovres anc in li actual form have utilitá a franceses por comprehension de Occidental-textus.

DER TAG, Wien, 3 august un del max diffuset diales austrian, sub titul «Sprechen Sie schon Occidental?» (Es-que vu ja parla Occidental?) publica un alegri articul ironios contra Esperanto e tre favorabil por Occidental. Li redaction junte un alinea scrit in Occidental e finient per: «... Pluri decisiv experienties in divers landes demonstra que on posse scrir e parlar Occidental in curt témpore». Li referent declara que li specimen del Occidental-textu prava li superioritá de Occidental al systemas anteriori e on comprende per to que Occidental durant du annus de propaganda ha trovat adherentes in plu quam 20 landes ja organisat in un international Occidental-Union con propri revúe e que li concurrentie bentost va esser obligat cessar su ignorantie vers Occidental.

DER VOLKSFREUND, Cleve (Germania), 18 mai, sub titul «Der Streit um die Weltsprache» (Li disputation pro li mundlingue) publica un long articul de Dr. Peipers (Köln). Il dí, que li desfacilitá in selection de un natural lingue quam L. I. (lingue international) es causat

precipue per que chascun nation vole defender su «national prestige». Un constructet lingue posse evitar ne solmen ti ci desfacilitá ma anc divers desfacilitás del appension (génere grammatical, complicat formes de conjugation etc.) Li paroles international deve esser li fundament del L. I., quo ja ha dit Lott e Liptay in li secul passat. Ma li autor de Esperanto ha tro negliget ti pensa pro un exagerat regularitá secun un artificial schematisme. Li inventores del divers projectes de L. I. ne successat subordinar al regules li mult paroles completmen international; on ne posse presentar derivates: exploder — explodion o exploser — explosion etc. Ti problema es soluet in maniere contentativ per li systema Occidental.

DAS NEUE REICH, semanale por cultura, politica e economie national, Wien-Innsbruck-München, nr 38, 22 junio, recense Cosmoglotta in favorabil maniere e sublinea li avantage de Occidental que it, in contrast a Esperanto, assimila-se li natural formes del vivent lingues in max alt gradu possibil.

TAGESBOTE, diale, Brno (Brünn), Tchecoslovacia, 15 junio, con sympathie rapporta pri li articul de E. Pigal «Nor scoles — Latin e lingue international» in «Ingenieur-Zeitschrift» (nr 8, Teplitz-Schönau), emphasante que Occidental sin dúbita es immediatmen comprensibil a omni universitatanes (D Akademiker), sin studie anteriori, quo li redaction qualifica quam avantage cardinal. In plu it constata que li approbation de Occidental per conosset linguistes es un injoyant facte.

E. P.

ŠKOLA MĚŠŤANSKÁ (Scole civil), Praha, in su nr 18 publicat de nove un curt recension de nr 4 de Cosmoglotta de J. Podobský con li information pri li morte de J. F. Khun.

J. Pd.

ÉCOLE MODERNE de Commerce et de Langues, Strasbourg, li director de quel, sr G. Bohin, es conosset a nor letores quam secretario del Occidental-Société de Francia, in su section lingual nu have lecciones anc por Occidental, ultra frances, angles, german, italian, hispan.

DER FREMDSPRACHLER, revúe por cultivation de lingues, organ del German Union por Lingues extran (Deutscher Fremdsprachlerbund), Berlin, junio, julí, august, in exchange contra nor annuncia, inserte reclame por Occidental e Cosmoglotta.

E. P.

In PARIS MIDI Maurice de Walleffe, pledante por li Union de Europa, dí: «Si in tot Europa on vell leer li sam gazettes quam to es in Chicago, San Francisco e New York, queles es plu lontan inter se quam Paris, Berlin e Roma, cn vell haver sempre ancor disputes pri electiones, economie, hygiene e religion, ma ne vell exister guerres; on vell posser unir se pri omnicos in avan.» Ma to supposi que li gazettes vell esser scrit in li sam lingue partú comprensibil, i. e. in Occidental. Es-que Maurice de Walleffe ancor ne conosse Occidental?

Ax. W.

In SCHOLA ET VITA, nr 6, 7, sub titul «Interlingua es pro omnes et non solum pro latinistas» li redactor sr Mastropaolo contradi al opiniones expreset in Cosmoglotta que L. s. F. (Latino sine Flexione) es solmen por latinistes e un micri circul de idées. Il opine que

Schola et Vita es li sol «revista»¹⁾ quel ne have contententie interlinguistic, ma ha eat in li practic usation de Interlingua, e asserite que it es comprensibil e usabil por scriptura anc de non-latinistes. Ma si on examina li liste del socios del Academia pro Interlingua, on trova ta solmen erudit persones, precipue con studies superiori. Quo concerne li «immediato intelligibilitate» on deve dubitar, es-que un non-latinist va comprender «copia et varietato de articulos», quel significa ne «copie» ma «multité», samli: disce, i, oportet, idoneitate, divitiae, sci es paroles mort del antiqui latin e ne comprensibil a non-latinistes. Li parol «i» null non-latinist e mem mult latinistes ne va posser identificar ni trovar in un latin lexico! Li non-latinist deve apprender in L. s. F. centenes de irregulari participies e sovente anc antiquat present-radicas. It es sufficient leer li humoristic angul de Schola et Vita por vider li tot pesosita de L. s. F. Forsan por li catholic prestre, acostumat al latin, to posse semblar sufficient usabil, ma por li pulsant vive modern it es tro pesos. Ma li principal manca, li impossibilita de propri derivationes e nov-formationes, li sol criterie de vive in un lingue, sr Mastropaolo ne posset refutar, il contenta se per negar su necessita: «Regulas de derivatione non es necessario, nam quasi semper vocabulo derivato es internationale». To es un profund erra. Chascun qui ha secuet li vive del lingues durant li ultim 20 annus, va constatar li grandissim numere de nov expressiones e noviformaliones in quasi omni lingues. Un lingue quel ne possede ti potentie, es mort, e posse solmen vegetar in su anteyan limites ma ne conquistar nov campos de application. Per ti confession (li uva es acid) de impossibilita de nov derivationes, nor these es do justificat. Naturalmen ti differentie de opinion nullmen implica alcun adversita; in contrari, noi pensa que chascun erudit adherent a L. s. F. es un acquisition por nor commun ide de un L. I., pri quel noi posse joyar. Ma yo pensa que nor critica esset plu just e imparcial quam ti de seniora Pankhurst pri Occidental, publicat in su libre pri L. I., quel contene direct fals dates e miscomprensos pri Occidental, durant que noi enuncia un judicie general motivat per li enunciationes del adherentes self de L. s. F. Li futur va monstrar, esque it es fals.

E.W.

ESPERANTO EN NIPPONLANDO, Tokyo, nr 45, 46, occupante se pri li recent historie del L. I. (Ido, Interlingua, Novial, Occidental) opposi a Occidental li ide de un «Oriental». Nu, li nomine ne fa it. Till hodie ne-qui ha respondet a nor question: per quo Esperanto es plu oriental o plu mundlingue quam Occidental? Esperanto es solmen plu artificial quam Occidental, ma in su natural elements Esperanto, sam quam Occidental, es fundat solmen sur lingues occidental. Ples leer in Cosmoglotta anc li articules relatent: «Oriente occidental» de japanes Dr. S. Nishi (nr 49), «International o Romanic» de E. de Wahl e «Occidental e Mundlingue» de japanes Prof. K. Asakawa (nr 57).

E. P.

«MALFERMO DE INTERNACIA ESPERANTO-MUZE0». Sub ti official titul un international archive de L. I. esset apertet con public

¹⁾ Esque ti parol es latin? Esque it es international? In quel lexico un non-latinist volent scrir L. s. F. vell trovar it, malgre li existentie de Interlingua ja depos plu quam 20 annus?

solemnitás li 1 august in «Oesterreichische Nationalbibliothek», Wien. President del Austrian Republica Wilhelm Miklas inaugurante li muséo enunciat que li homanité civilisat besona un lingue international quel es facil tam in comprensibilitá quam in apprension e si Esperanto satisfá ti condition, noi posse solmen salutar it. Yes, si...! — Li director del «Muzeo» communicat al Occidental-Union que ti institut es consacrat a omni systemas de L. I. e que it have anc un section por Occidental.

*

Sr A. MICHAUX, organisator del unesim congress de Esperanto in Boulogne sur Mer, Francia, autor de Romanal e amic de nor movement, ha attin'et su 70esim die de nascentie. Noi transmise le cordial gratulationes e bondesires por ulterior fructuos labores in li camp del L. I.

Red.

*

Un folie de print-erras in li MANUAL DE CONVERSATION ha apparit. Ples demandar it per sr G. Bohin, 7 Place de Bordeaux, Strasbourg, Francia.

L. M. de G.

Humanistes

de Roda Roda

Noi posedet in Austria ante mult, mult annus un tre prudent, erudit ministro militari, li generale baron de Kuhn. In annu 1866 il defendet Tyrolia contra Garibaldi per un manade de tiratores tyrolesi; il ha scrit tre prudent libres; un fin talent e tre capabil mann, un excellent hom. Homeros e Horatius esset su permanent companes.

Un-quande esset session de ministros sub presidentie del old imperator. Li ministro de instruction... yo crede que Strohmayer esset su nómine... defendet emphatic- e ardentmen, ya, ardentmen li humanistic gymnasie.

«It es un fabul», il clamat, «que li saventies aquisitet sur li banc del scol es inútil por li vive, que illi quam ballast es jettat del memorie, que illi es perdit. Li classic lingues dá al intellectu profundore, richness, elasticitá».

Li ministro de instruction finit su panegyre per un ardent appell al imperator:

«In li question del humanistic gymnasie yo desira har victet!».

Silentie inter li ministros.

Li generale Kuhn, meditante a Strohmayer: «...desira har victet, ... to es li «optativus perfecti»; qualmen to es dit in grec, excellentie?»

Strohmayer rubijat til ultra li orel'es.

E Kuhn in su quietá imperturbabil: «nikéo, neníkeka, neni-kékoimi . . . ne-ver?».

Li old emperor Francisco Joseph ne posedet humor; il havet custom ne rider.

Ma ci-vez, on dí, il ridet.

Trad. W. Blaschke.

Maestro in su profession

Li director de jurnal, (ingageant un reporter): «E si vu vell dever scrir un articul pri un tema quel vu ne conosse, qualmen vu vell comensar?»

Li reporter: «Noi aprende de un tre serios fonte . . .»

Li director: «Excellent . . . e qualmen vu vell finir?»

Li reporter: «Noi vell plenar li columnes pri ti ci thema, ma li manca de loc . . .»

Li director: «Excellentissim, yo ingagea vos». *Trad. L. M. G.*

Miscellanies.

Li metric systema in USA es «admisset» per un act del congress in annu 1869. Ma it ancor ne es officialmen introductet ta tam poc quam in Anglia, *benque (= quancam, malgré que) it es usat de omni scientic laboratorias e del total industrie electric. Anc li departement militari e marinari e li grand hospitales usa it. It plu e plu intra anc li fabricas. Apartmen ta u on labora con liquides, on prefere it al complicat systema del gallones, barrels, quarters, pints e bushels. Tot industries plu e plu inclina al metric systema, p. ex. li horlojerie, li juvelerie, li industrie del optica, radio e aviation. In altri branches de fabrication es ductent grand firmas, p. ex. Goodyear Tire and Rubber Company, Baldwin Locomotive Works, De Laval Separator Company, e Library Bureau. «The Metric Association» directe li tot movement por introduction definitiv e official del metric systema; it edite un propri revue «The Measurement». Li opposition es representat per li «American Institute of Weights and Measures», quel, sam quam li Metric Association, have su sede in New York.

Secun "Umschau", XXXIII. 20.

E. P.

Eigentümer, Herausgeber und Verleger: Occidental-Union, Sitz: Mauer bei Wien.
Verantwortl. Schriftleiter: Ing. E. Pigal, Liesing b. Wien. Druck: Milan Nedvidek, Tábor.